

*Francitus*

Sö, egnì fò d'i reclüsòre  
care scècc, turnì a l'età  
de quaranta o trent'agn fà.  
Sö de corsa! A l'Oratòre  
gh'è la festa e l'sì pò bé.  
Don Antóne l'è amò che.  
L'è amò ché l'ispassèsa,  
col « breviare » a mà mansina,

sota 'l pórtech in rüina.  
Fòrse l'pensa e l'isvanèsa  
d'ìga 'n fabrica ü palàss...  
per dàm l'ase de sfogàss!  
Ma i è i tép d'i strombetade,  
d'i « cortéi »... d'i « gaiardècc »!  
L'è zà a' tròp che m'reste a tècc.  
Gh'è i scribàite per i strade,  
sö söi mür: « Viva chèl là! »...  
L'è zà bel pödi fiadà!  
Ma se gh'è quach bröta céra  
che de schèrs la me tosséga,  
l'è pò a' ignötel tecà béga.  
Nóter ché m'ghe turna ontéra!  
Don Antóne l'me l'à décc  
de fà sito e tirà drécc.  
Don Antóne: ü prêt che l'rüga  
dét de nóter fina 'n fònd,  
che se ü döbe l'me la pònd,  
se in quach « morle » m'ispaciügà  
l'è lé a dìm perchè e però...  
fin che 'l döbe l'salta fò.  
Oh, quate olte, e senza bösta,  
m'à scümìt ciapà la paga,  
lassà alì i nòs' tórcc e staga,  
catà fò la strada giösta  
e, a la fi, sènt ol magù  
deleguà 'n d'ü süspirù!  
Sbachtetade? Sé... e de lena!...  
üde a' senza ì facc negót.  
Se s'ghe entràa gna per fèr rót,  
l'éra ü caso... ü caso apena...  
Ma a fà 'l cönt tra 'l dà e 'l turnà  
l'éra mèi portale a cà!  
E, per chèl che me regórde,  
i éra mana del Signür.  
Scomparìt ol prim brüsur,  
no' s'pödià che 'ndà decórde.  
Don Antóne pròpe issé,  
l'à fài vèd de ülim gran bé!  
Sö, egnì fò d'i reclüsòre,

turnì 'ndré fina ai somésse!  
Se gh'ì vüt d'i benefésse,  
l'è stai lé 'n de l'Oratòre.  
Ma l'amùr che avrì 'mparàt...  
dóma Lü l've l'à snissàt!  
Quando ai prediche de sira,  
l'imbocàa virtü e dūtrina,  
con chël sò parlà 'n surdina  
come a dì: « Fà 'l sàe. Respira  
l'aria buna e spüda 'l rest,  
perchè 'l món d l'è pié de pèst! »  
Sèrte prediche gaiarde,  
dice issé come s'farèss  
che, a confrónt, chèle de adèss,  
nöe com'i è... i è egnide tarde.  
Sèrte prediche de gód  
coi öcc löster, col sanglót!  
Quando a Brat a passà i ferie,  
quindes dé o öna setimana,  
— m'ismiciàa la Presolana,  
me egnia in öde i catiérie —  
dóma a sta col Don Antóne  
töte i ròbe i 'ndàa benone!  
Quando s'fàa la partidina  
regondicc in diressiù:  
Öna bòssa de chël bù  
portàt sö de la cantina,  
quàter ciàcole, ü cotècc...  
A s'gh'ia piö gna sògn gna frècc!  
Sé, decórde, i ròbe dice  
fina ché i è 'nteressade:  
Primaére urmaì passade  
che m'gh'à göst a edile scrice  
Don Antóne, per ognü,  
l'è a dì póch la zoentü!  
Ma al momènt piö gròss d'i guai,  
quando i scècc i 'ndàa soldàt  
ü per ü e i l'à saludàt  
per turnà... o per turnà mai,  
pròpe alura m'à capìt  
Don Antóne... e m'à pianzìt!



I sò scècc ch'indàa a la guèra,  
— l'éra 'l tép de fà i conquèste  
i sò scècc söi prime léste  
d'i soldàcc de mar, de tèra,  
de aviassiù... portàcc ivià,  
sensa fal, de 'ncö a 'ndomà!  
L'à pianzìt a' Lü sens'óter,  
specialmènt i prime nòcc:  
portà vià i sò « zerbinòcc »!  
— l'éra 'l tìtol nòst de nóter —.  
Per ognü l'gh'à vüt de dì:  
« Và e... fa miga 'l berechì! »  
Per ognü la sò sgürlida,  
fòrse l'öltima de sènt.  
Benedeta 'n chèl momènt  
la mà dacia e la strenzida!  
Röstech, dür infina 'n fònd...  
perchè l'gh'ia ü sanglót de scónd  
Oh, quate olte, al brüs d'í fiamme,  
sbalotàcc de sà e de là,  
mè egnìt vòia de pregà  
e, col nòm d'i nòste mame,  
de la boca — e m'séra òm! —  
me egnìt föra pò 'l sò nòm!  
E, per chèl che me regórde,  
l'éra mana del Signür!  
Me sparià fina a' i brüsur.  
Gh'è passàt ol tép, decórde.  
Ma a la sira, a l'sì pò bé,  
Don Antóne l'è amò ché!